

दिनांक : 13.02.2026

समय : 18.45 बजे

आकाशवाणी जयपुर—अजमेर
प्रादेशिक समाचार

- प्रधानमंत्री नरेन्द्र मोदी नुवी दिल्ली मांय प्रधानमंत्री दफतर री नुवी इमारत अर दो दूजा सरकारी भवन वाळा सेवा तीर्थ रो उद्घाटन करयो ।
- प्रदेश मांय निजू उच्च शिक्षा संस्थानां माथे असरदार नियंत्रण अर गडबडियां माथे रोक सारू राज्य सरकार नियामक आयोग बणावेला ।
- केन्द्रीय कृषि मंत्री शिवराज सिंह चौहान कह्यो— अजे ई व्हीया सगळा मुक्त व्यापार समझौतां मांय काश्तकारां रा कल्याण ने ठावी प्राथमिकता दीरीजी ।
- भीलवाड़ा जिला रा गंगापुर हलका मांय फ्यूल पीवण ऊं चार लोगां री मौत— प्रशासन गांव मांय घर—घर स्वास्थ्य जांच करावण रा निर्देश दिया ।

000

प्रधानमंत्री नरेन्द्र मोदी आज राष्ट्रीय राजधानी मांय 'सेवा तीर्थ' अर 'कर्तव्य भवन-1 अर 2' रो औपचारिक उद्घाटन करयो । ओ वां रो नुवो दफतर व्हेला । 'सेवा तीर्थ' मांय प्रधानमंत्री दफतर राष्ट्रीय सुरक्षा परिषद अर मंत्रिमंडल सचिवालय ने भेळा करी ज्या है, जदके 'कर्तव्य भवन' परिसर मांय रोकड, रक्षा, स्वास्थ्य अर शिक्षा जैस्या महताऊ मंत्रालय व्हेला । ओ परिसर आधुनिक सुविधावां अर आला हिफाजती प्रणालियां ऊं लैस है । उद्घाटन रे पछे प्रधानमंत्री जनहित ऊं जुडी केई महताऊ फाइलां माथे दस्तखत कर्या । श्री मोदी 'प्रधानमंत्री राहत योजना' ने मंजूरी दी, जिण रे तैत दुर्घटना पीड़ितां ने डेढ़ लाख रिप्या ताई रो मुफ्त ईलाज मिल सकेला । वणा 'लखपति दीदी' योजना रो लगस दुगणो करता मार्च 2029 ताई 6 करोड़ महिलावां फायदो पूगावण रो लगस तैय करयो है ।

000

राष्ट्रपति द्रौपदी मुर्मु कह्यो है के एक विकसित राष्ट्र बणावण सारू नी फगत राजनीतिक स्थिरता अर मजबूत माली हालात री जरूरत होवे है बल्कि स्वस्थ, शिक्षित अर जिम्मेदार रेहवासियां री ई जरूरत है । नुवी दिल्ली मांय सशक्त भारत सारू कर्मयोग माथे राष्ट्रव्यापी अभियान मांय बोलता राष्ट्रपति कयो के लोगां री सक्रिय भागीदारी रे बिना किण ई राष्ट्रीय लगस ने हासिल करणो करडो है ।

000

प्रदेश मांय निजू उच्च शिक्षा संस्थानां माथे असरदार नियंत्रण अर गडबडियां री रोकथाम सारू राज्य सरकार नियामक आयोग बणावेला । विधानसभा मांय आज प्रश्नकाल रे दौरान उपमुख्यमंत्री अर उच्च शिक्षा मंत्री डॉ. प्रेमचंद बैरवा आ जाणकारी दी । वणा बतायो के ई आयोग रो नुवो प्रारूप तैयार करयो जावे । जिण मांय राष्ट्रीय शिक्षा नीति-2020 रा प्रावधानां ने ई भेळा कर्या जाएला, जिण ऊं निजू विश्वविद्यालयां री कार्यप्रणाली ने और बत्ती आरो—पार बणायो जा सके । डॉ. बैरवा सदन ने जाणकारी दी कि फर्जी डिग्रियां बांटण अर दूजी गडबडियां री शिकायतां माथे 10 निजू विश्वविद्यालयां रे खिलाफ जांच रा हुकम दीरी ज्या है ।

उच्च शिक्षा मंत्री बतायो के शारीरिक शिक्षा अध्यापक भर्ती परीक्षा-2022 मांय व्ही गडबडियां री सम्पूरण जांच सारू एसओजी ने कागद लिखी ज्यो है अर दोषी कार्मिकां रे खिलाफ करडी कानूनी कार्रवाई करी जावे ।

000

सामाजिक न्याय अर अधिकारिता मंत्री अविनाश गहलोट आज विधानसभा मांय बतायो के राज्य सरकार थैलीसीमिया पीड़ितां ने मुफ्त ईलाज अर पेंशन री सुविधा मुहैया कराय री है। वणा कयो के भरतपुर ने छोड़ने परदेश रा सगळा 6 संभाग मुख्यालयां माथे डे-केयर सेंटर चाल रिया है, जठे बिना रिप्लेसमेंट रे खून चढ़ावण, जांच अर थैरेपी री सुबीता पूरी तरह मुफ्त है। श्री गहलोट जाणकारी दी कै राज्य मांय थैलीसीमिया रा 1 हजार 105 रोगियां ने 1 हजार 250 रुपया हर म्हीने पेंशन दी जावे। चिंताजोग मरीजां रा बोन मैरो ट्रांसप्लांट सारू 10 लाख रिप्या ताई री रोकड़ मदद रो ई प्रावधान है। अबार प्रदेश रा 797 टाबर ई अनुवांशिक बीमारी री जद मांय है।

000

मुख्य सचिव वी. श्रीनिवास कयो है के केंद्र अर राज्य सरकार री केई योजनावां बैंकां री मदद ऊं कामयाब व्हे सके है। मुख्य सचिव आज जयपुर मांय नाबार्ड कानी ऊं व्हीया स्टेट क्रेडिट सेमिनार मांय बोल रिया हा। वणा कयो के सरकार री केई योजनावां इण तरह री है जिण मांय रोकड़ संसाधनां री जरूरत होवे है अर लोगां कने अ संसाधन मौजूद नी होवण ऊं बैंकां री भूमिका महताऊ व्हे जावे है। श्रीनिवास बैंकां ऊं अरज करी वे योजनावां ने कामयाब करण मांय कर्ज अर दूजी मदद करने सहयोग देवे। मुख्य सचिव ई बात माथे संतोष जतायो के लारला दिनां कर्ज पाछो नी वसूल होवण री प्रवृत्ति मांय कमी आई है अर गांवाई हलकां मांय उद्यमशीलता बधी है। सेमिनार मांय स्टेट फोकस पेपर रो विमोचन करयो। कार्यक्रम रे पछे मीडिया साथे बतळ मांय श्रीनिवास कह्यो के राज्य रा बजट मांय खेती अर गांवाई विकास माथे खास जोर दीरी ज्यो है।

.....

000

केंद्रीय कृषि अर किसान कल्याण मंत्री शिवराज सिंह चौहान आज नुवी दिल्ली मांय भारतीय कृषि अनुसंधान संस्थान रा 64वां दीक्षांत जळसा मांय बोलता कयो के अजे ई व्हीया सगळा मुक्त कारोबार समझौता मांय काश्तकारां रा कल्याण ने ठावी प्राथमिकता दीरीजी है। श्री चौहान बतायो के भारत अबे चीन ने पाछे छोड़ने चावळ निपज मांय दुनिया मांय पहली ठौड माथे आय ग्यो है अर भारतीय गेहूं री किस्मां ई विश्व स्तर माथे आपरी पिछाण बणा री है। वणा कयो के देश मांय खेती रा बुनियादी ढांचा मांय सुधार ऊं काश्तकारां ने घणो फायदो व्हीयो है।

.....

000

भीलवाड़ा जिला रा गंगापुर थाणा हलका मांय खाना गर्म करण वाळा रसायन ने शराब समझ र पीवण ऊं चार लोगां री मौत व्हे ग्यी, पुलिस मुजब आलोली गांव रा रेहवण वाळा अ लोग एक ब्याव मांय काम करण रे पछे घर आया हा, जठै रसायन पी लियो। हादसा री सूचना मिलण माथे जिला कलेक्टर जसमीत सिंह संधू अर पुलिस अधीक्षक धर्मेन्द्र सिंह यादव मौका माथे पूग्या। जिला कलेक्टर गांव मांय घर-घर स्वास्थ्य जांच करावण रा निर्देश दिया है। पुलिस अधीक्षक बतायो के रसायन री बोटल जब्त कर लीरीजी है अर सप्लाई करण वाळी दुकान दी जांच करी जावे। राज्य सरकार कानी ऊं मरण वाळा पिरवार ने मुख्यमंत्री सहायता कोष ऊं एक-एक लाख रिप्या री माली मदद दी जाएला।

000

हनुमानगढ़ जिला रा पीलीबंगा मांय आज सड़क हादसा मांय एक महिला री मौत व्हे ग्यी अर 35 घायल व्हे ग्या। ओ हादसो बस रे अमरपुरा रेलवे ओवरब्रिज माथे डिवाइडर ऊं टकरावण ऊं व्हीयो। अ लोग बीकानेर ऊं पीलीबंगा एक कार्यक्रम मांय भेळा होवण जा रिया हा। घायलां ने पीलीबंगा, हनुमानगढ़ अर सूरतगढ़ रा अस्पतालां मांय भर्ती करायी ज्यो है।

000

भ्रष्टाचार निरोधक ब्यूरो आज फलोदी जिला री पंचायत समिति बाप मांय लाग्या कनिष्ठ सहायक शुभकरण परिहार रा ठिकानां पाछे आमद ऊं बत्ती संपत्ति रा मामला मांय तलाशी ली। ब्यूरो री न्यारी-न्यारी टीमां बीकानेर अर फलोदी मांय एक साथे पांच ठोडां आ कार्यवाही करी। तलाशी रे दौरान आरोपी कने 75 लाख रिप्या रोकड़, एक किलो सोना अर दो किलो चांदी बरामद करीजी है। इण रे अलावा बीकानेर अर पुनरासर मांय चार मकानां अर 17 हेक्टेयर कृषि भूमि रा दस्तावेज ई मिल्या है। ब्यूरो मुजब प्राथमिक जांच मांय कनिष्ठ सहायक कने कानूनी आमद री तुलना मांय 938 फीसदी बत्ती संपत्ति होवण री जाणकारी मिली ही।

000

आज विश्व रेडियो दिवस है। 13 फरवरी 1946 ने संयुक्त राष्ट्र रेडियो री थापना री याद मांय ओ दिन मनायो जावे। ई साल री थीम **"रेडियो और कृत्रिम बुद्धिमत्ता : एआई एक उपकरण है, आवाज़ नहीं"** राख्यी ज्यी है। रेडियो आज ई दूरदराज रा हलकां मांय जाणकारी रो मजबूत स्रोत बण्योडो है। जोधपुर ज़िला रा मैलाणा गाँव रा बरोबर सुणण वाळा छैलाराम मेघवाल रेडियो रे प्रति आपरा विचार कुछ ई तरह साझा कर्या।

.....

000

जैसलमेर ज़िला रा तनोट माता मिन्दर मांय सीमा दरसाव सारू अबे ऑनलाइन बॉर्डर पास जरूरी कर दीरी ज्यो है। मिन्दर ट्रस्ट बन्दोवस्ता ने चोखा राखण सारू ओ फ़ैसलो लियो है। सैलाणियां ने जातरा ऊं पैला ट्रस्ट री आधिकारिक वेबसाइट माथे अर्जी देवणी व्हेला। और जाणकारी दे रिया है म्हारा जैसलमेर खबरनवीस—

.....

000

राज्य निर्वाचन आयोग पंचायती राज संस्थावां रा आवता आम चुनाव सारू मतदान प्रक्रिया तैय कर दी है। राज्य निर्वाचन आयुक्त राजेश्वर सिंह बतायो के जिला परिषद अर पंचायत समितियां रा सदस्यां रा चुनाव इलेक्ट्रॉनिक वोटिंग मशीन —ईवीएम री मार्फत व्हेला। वटे ई ग्राम पंचायत सरपंच अर वार्ड पंच रा चुनाव मतपेटी अर मतपत्रां री मार्फत पूरा कराया जाएला। आयुक्त बतायो के चुनाव प्रक्रिया ने साफगोई अर बन्दोवस्त बणावण रा मकसद ऊं ओ फ़ैसलो करी ज्यो है। वणा ई बारा मांय अहलकारां ने तैय इन्तजाम मुजब जरूरी तैयारियां करण रा निर्देश दिया।

000